

27 January 2025

समे .18:15 Hrs

<><><><><><>

Headlines

- प्रधानमंत्री नरेंद्र मोदी होरें अज्ज संझा एनसीसी कैडटें दी सलाना रैली गी संबोधित कीता। आखेआ जे नौजवानें दे सर्वांगीन विकास लेई एनसीसी इक मता महत्वपूर्ण ते असरदार मंच ऐ।
- प्रधानमंत्री होर कल देहरादून च 38मीं राष्ट्रीय खेडुं दा उद्घाटन कीता।
- मुख्य सचिव अटल डुल्लू होरें जम्मू-कश्मीर च जारी बक्ख-बक्ख सड़क परियोजनाएं दी प्रगति दी समीक्षा कीती।
- मौसम विभाग नै 29 जनवरी संझा तोड़ी जम्मू संभाग च मौसम खुशक रौहने दी पेशगोई कीती ऐ।

<><><><><><>

PM-NCC Rally

प्रधानमंत्री नरेंद्र मोदी होरें अज्ज नमीं दिल्ली दे करियप्पा परेड ग्राउंड च एनसीसी कैडटें दी सलाना रैली गी संबोधित कीता। इस मौके उनें आखेआ जे एनसीसी युवाएं दे पूरे पराते विकास ते व्यक्तित्व निर्माण लेई इक बड़ा गै महत्वपूर्ण मंच ऐ ते देसै गी अपने एनसीसी कैडटें दे जज्वे, निष्ठा, दृढ़ संकल्प ते समर्पणभाव पर मान ऐ। इस कार्यक्रम च 2361 एनसीसी कैडटें हिस्सा लैता। 800 कोला मते कैडटें सांस्कृतिक रंगारंग कार्यक्रमें च हिस्सा लैता। मोदी होरें राष्ट्र निर्माण च एनसीसी कैडटें दी भूमिका दी बी सराहना कीती।

<><><><><><>

PM-National-Games

प्रधानमंत्री नरेंद्र मोदी होर कल उत्तराखंड दे देहरादून च महाराणा प्रताप स्टेडियम च 38मीं राष्ट्रीय खेडुं दा उद्घाटन करंगन जेहड़ियां 14 फरवरी तगर जारी रौहंगन। राष्ट्रीय खेडुं दा आयोजन रियासत दे 8 जिलें दे 11 शैहरें च होने दा प्रस्ताव ऐ। उत्तराखंड च 35 बक्ख-बक्ख खेडुं दे 47 आयोजन कीते जाने न। उद्घाटन समारोह लेई केंद्री मंत्रियें भारतीय ओलंपिक संघ ते राष्ट्रीय खडारी आवा रदे न। एहदी पछोक्कड़ै च भारती ओलंपिक संघ दियां अध्यक्ष पी.टी उषा हुंदा अज्ज देहरादून हवाई अड्डे पर राज्य दियां खेडु मंत्री रेखा आर्या हुंदे आसेआ सोआगत कीता गेआ।

<><><><><><>

CS-PWD Meeting

मुख्य सचिव अटल डुल्लू होरें अज्ज मैहकमा पीडब्ल्यूडी दी इक बैठक सदिए जम्मू-कश्मीर च चलै करदिएं बक्ख-बक्ख सड़क परियोजनाएं दे कम्मे दी प्रगति, रफ्तार तेउउपलब्धिएं दी समीक्षा कीती। बैठका च कम्में गी तोड़ चाढ़ने आहिलिएं एजेंसिएं दे इंजीनियर बी मजूद हे। सब्बनें कम्में दा तफसीली जायजा लैने दे बाद अटल डुल्लू होरें कम्में गी मित्थे गेदे समें दे अंदर-अंदर तोड़ चाढ़ना यकीनी बनाने लेई इंजीनियरें दी छमता बधाने ते कम्मै दे मयार कन्नै विजन कोई समझौता कीते दे एहदी रफ्तार च तेजी आहनने पर बी जोर दित्ता। उनें बड्डे अधिकारिएं गी आखेआ जे ओह कम्में दी प्रगति पर आपूं नियमित ते नेडमी तक्क रक्खना। उनें प्रधानमंत्री ग्राम सड़क योजना दे चौथे गेड़ तैहत सर्वेक्षण दा कम्म पूरा करियै उन्दी तफसीली प्रोजेक्ट रिपोर्ट जमा करान तां जे जिनें इलाकें तोड़ी 12 म्हीनें हर मौसम दौरान खुल्ली रौहने आहिलियां सड़कां उपलब्ध नेही हैन, उत्थें बी पक्क गै सड़क राबता उपलब्ध कराया जा।

<><><><><><>

HM-Holy Dip

केंद्री मंत्री अमित शाह होरें अजज महाकुम्भ प्रयागराज च गंगा, यमुना ते सरस्वती नदियें दे त्रिवेणी संगम च पवित्तर चलोबी लाई। इस मौके पर केंद्री मंत्री हुंदे कन्नै उत्तर प्रदेश दे मुख्यमंत्री योगी आदित्यनाथ ते केई संतें बी त्रिवेणी संगम च पवित्तर चलोबी लाई।

<><><><><><>

Badhaal-Recovery

रजौरी जिले दे बडहाल गां थमां दिल बधाने आहली खबरां आवै करदिआं न कीजे सेहत सरबन्धी अधिकारिएं इस गल्लै दी तसदीक कीती ऐ जे रहस्यमयी बमारी दे लपेटे च आए दे मरीजें दी हालत च सुधार होआ करदा ऐ। जीएमसी रजौरी च इस रहस्यमयी बमारी करी प्रभावत 11एं मरीजें दा ऐल्लै इलाज चलै करदा ऐ ते सब्बनें दी हालत स्थिर बनी दी ऐ। इंदे अलावा पीजीआई चंडीगढ़ च भर्ती 25एं बरें दे ऐजाज़ अहमद नां दे मरीज दी हालत च बी सुधार होआ करदा ऐ। सरकारी मेडिकल कॉलेज रजौरी दे प्रिंसिपल होरें इस गल्लै गी साफ कीता ऐ जे अब्बल दर्जे दिएं लैबोटारिएं दिआं रिपोर्टां, बडहाल च कुसै वायरल इन्फैक्शन दी शेंका गी खारिज करै करदिआं न इस करियै लोकें गी मता घाबबरना नेई लोड़चदा ऐ। ऊआं प्रभावत मरीजें गी बक्ख-नखेड़ियै रक्खने दी बवस्था गी बरोबर लागू रक्खेआ गेदा ऐ ते प्रशासन नै बी हालात उप्पर नेडमी तक्क रक्खी दी ऐ। तोआई, एमएलए इफ्तिकार अहमद होरें प्रभावित लोकें लेई जिला प्रशासन आसेआ स्थापित Quarantine Centre दा दौरा लाया ते उत्थे दे इंतजामें दा जायजा लैता। इस मौके पर उनें आखेआ जे जिला प्रशासन आसेआ कीते गेदे इंतजाम मते खरे

न। उनें गलाया जे उत्थें लोकें दी मेडिकल जांच कीती जा रदी ऐ ते जांच कराने दे बाद उनेंगी रूट्टी-पानी बी उपलब्ध करोआया जा'रदा ऐ। एमएलए इफ्तिकार अहमद होरें आखेआ।

<><><><><><>

Forest Fire Poonch

पुंछ जिले दे मेंढर आहले जांगली इलाके च कब्ज़ा रेखा दे नेडे कल अगग लग्गी गई जेहदे पर काबू पाने आस्तै तुरत प्रतिक्रिया आहली इक टीम उत्थे भेजी गई। ध्यानजोग ऐ जे खित्ते च पिच्छले काफी समें थमां सोक्के जनेय हालात बने दे न जिस करी जंगली इलाके च अगग लग्गने दिएं घटनाएं च बाद्दा दर्ज कीता जा करदा ऐ। सरबन्धत अधिकारिएं हालात उप्पर नेडमी तक्क रक्खी दी ऐ ते इस चाल्ली दिएं घटनाएं गी रोकने लेई एहतियाती गैहीं पुट्टियां जा करदियां न। आकाशवाणी समाचार कन्नै गल्ल करदे होई डी.एफ.ओ पुंछ नावेद अहमद होरें आखेआ जे जंगलें दे 40 हैक्टर इलाके च संदिग्ध हालात च अगग लग्गी गई। उनें आखेआ।

<><><><><><>

Accident

पुंछ जिले दी मंडी तहसील च पेश आए दे इक सड़क हादसे च 4 फौजिएं दे घायल होने दी खबर ऐ। अधिकारिक जानकारी मुजब मंडी तहसील दे साब्जियां इलाके दे गंताऽ मोड़ कश इक गड्डी जेदे च एह लोक सोआर हे, सड़कें परा रूलकी गई। घायल सैनिकें च इक अधिकारी बी शामिल ऐ। हादसे दे तुरत मगरा घायलें गी इलाज लेई नेडे दे अस्पताल पुजाया गेआ। तोआई, 'राजौरी जिले दे कोटरंका इलाके च पंजनारा थाहर इक गड्डी दे हादसे दा शकार होई जाने कारण त्रै जनें जख्मी होई गे। एहू दवै गड्डियां सड़कें परा रूलकिए हेठ नाले च जाई पेइयां। घायलें गी सरकारी मेडिकल कालेज राजौरी च दाखल कराया गेदा ऐ।

<><><><><><>

PMA-G Udhampur

प्रधानमंत्री आवास योजना तैहत ग्रामीण इलाके च बेमिसाल बदलाव दिक्खने गी लब्बा करदा ऐ कीजे इस योजना तैहत मते सारे ग्रामीण लोकें दे पक्के घरें दा सुखना सच होआ'रदा ऐ। प्रधानमंत्री आवास योजना ग्रामीण इलाके च रवा रदे लक्खां बदे परोआरें गी घरें दी चुनौती थमां निब्बड़ने चा मदद करारदी ऐ। इसै चाल्ली उधमपुर दे चिनैनी दे ग्रां थर्ड दे बसनीक राज अली होरें इस योजना थमां लाहू हासल कीता ऐ। उन्दे पक्के घरें दा सुखना सच करने लेई सरकार दा धन्नवाद कीता ऐ। इस मौके पर गल्ल करदे होई लाभार्थी राज अली होरें आखेआ।

<><><><><><>

MVD-Medical Camp

जनवरी म्हीने गी राश्ट्रीय सड़क सुरक्षा म्हीने दे रूपै च मनाया जंदा ऐ। इसै सिलसिले च जम्मू-कश्मीर च बी कई कार्यक्रम ते गतिविधियां आयोजित कीतियां जा करदयिं न।

किश्तवाड़ जिले दे गुलाबगढ़ पाडर दे बस अड्डे च गड़िणं दे डरैवरें, क्लींडरें ते ट्रांसपोर्टरें लेई मुफ्त डाक्टरी जांच दा इक कैप लोआया गेआ जिस दौरान उन्दी सेहत ते तंदरुस्ती दी जांच कीती गेई जेदे च नजर चैक करना ते ड्राइवरी लेई लोडचदी होरनें शारीरिक छमताएं दी जांच बी शामिल ही। इस मौके गल्ल करदे होई ए.आर.टी.ओ होरें आखेआ जे इस पैहल दा मकसद इस गल्लै गी यकीनी बनाना हा जे सड़कै पर गड़ियां चलाने आहले पूरी चाल्ली नरोए ते फिट होन। इस मौके उनेंगी दोआइयां बी दित्तियां गेइयां।

<><><><><><>

Weather-Highway

मौसम विभाग नै औंदी 29 जनवरी दी संझ तोहड़ी खित्ते च मौसम खुशक रौहने दी पेशगोई कीती ऐ। ऊ'आं औंदी 29 जनवरी दी रातीं ते 30 तरीक गी बडुलै प्रदेश दिएं टामीं-टामीं थाहें पर हौली बरखा ते बर्फबारी दी संभावना जताई गेई ऐ। एहदे परैन्त 31 जनवरी तगर मौसम बदलोखड़ा बने दा रौहग। तोआई जम्मू-श्रीनगर राश्ट्री जरनैली सिड़क एनएच-44 पर गड़िणं दी आओजाई दौने बक्खी दा बवस्थित ढंगै'नै चलै करदी ऐ। लोकें गी एह सलाह दित्ती गेदी ऐ जे ओहू अपनी लेन च पूरे अनुशासन कन्नै गड़ि चलान ते दिनै बेल्लै गै सफर गी तरजीह देन। उआं रजौरी ते पुंछ जिलें गी शोपियां कन्नै जोड़ने आहली ऐतिहासिक मुगल रोड अजें बी गड़िणं दी आओजाई लेई बंद ऐ।

<><><><><><>